

مؤسسة الطوارئ منظمة غير حكومية تأسست سنة ١٩٩٢ بـطرابلس، هدفها مكافحة إنعدام الأمن الغذائي و الفقر بالمدينة.

من سنة ٢٠١٦، افتتحت المؤسسة مركز لتوزيع مساعدات بالميناء، طرابلس. بتساعد الجمعية اليوم حوالي ٢٥٠٠ شخص شهرياً عبر سوبرماركت الطوارئ المجاني، و صيدلية الطوارئ المجانية. هيدا بالإضافة للمساعدات المدرسية يّلي عم تقدّمها بمساعدة المنظمات الأجنبية يّلي عم تدعمنا. إلى جانب البرنامج الإجتماعي و المساعدات، يحتلّ الشقّ الثقافي مكان مهمّ بالنسبة لإلنا.

ضمن هل برنامج الثقافي، قرّرنا المشاركة بتنظيم هالمحاضرة اليوم.

ليش طرابلس ببيروت؟

هل محاضرة خطوة نحو إبراز طرابلس كعاصمة ثقافية و إقتصادية بلبنان. هل ندوة دعوة للكلّ تيوجهوا نظرن نحو الشمال، و تيفتحو عيونن لتاريخ و تراث مدينة طرابلس.

مدينتنا بتستحق أكثر بكثير من يّلي عم نقدملا يا:

طرابلس عاصمة الثقافة العربية لعام ٢٠٢٤، طرابلس مدينة العلم و العلماء، طرابلس مدينة الكنائس و الجوامع و الأسواق و الخانات التراثية، و الحمامات و القلعة و برج السباع.

طرابلس مدينة معرض رشيد كرامي الدولي يّلي نحطّ على قائمة التراث العالمي بخطر من قبل الـUNESCO.

طرابلس الفيحاء يّلي بتحضن الميناء و الجزر و القبّة.

طرابلس الحنونة، طرابلس الأم الحاضنة لولادنا، دائماً بطعطينا بس نحنا ما منعطينها. ولا مرة خزلت أبنائها، بالعكس بتحضننا وبتستوعبنا، وبتعلمنا الطيبة وحب الآخر. مدينتنا دائماً بتبين فقيرة، تعيسة، مهملة مهمشة. بس وين ما كان بلبنان و بالعالم في فقر و مشاكل. ليش ما منحكي عن طرابلس إلا بهل شكل السلبي؟

نحن هون اليوم تنجرب نغير الصورة النمطية لعاصمة لبنان الثانية. مندعيكم تجوا تشوفوا طرابلس على حقيقتها، مثل ما الكتاب "طرابلس في عيون أبنائها و الجوار" وصفها. الشهادات بتنتقل روح المدينة و طيبة أهلها، بالإضافة لمكانة و أهمية المدينة لكل الشمال.

الكتاب بيضوي على الحياة الطرابلسية يلي عم نفتقدها بسبب التغيير الديموغرافي يلي أثر علينا كثير، و هيدا لأنو نحنا، أبناء طرابلس، تركناها و نسيناها و هجرناها. بس نحنا ما رح نسنسلم للبؤس، و ثقافتنا ثقافة الحياة، رح نضل بطرابلس، و رح نضل نقاوم بواسطة العلم و الثقافة و الحضارة و العيش المشترك.

و مندعي كل الشباب يساعدونا و ينضموا لينا بهل مسيرة حتى نشجع المبادرات الثقافية بطرابلس و عن طرابلس: هيك منبني المستقبل.

بدنا نستهلك تراث المدينة و تاريخها، حتى نفجر الطاقة الكبيرة يلي موجودة فيها. من خلال هل محاضرة، من حب نوجه رسالة لكل الموجودين معنا، و نقلن: أعطوا طرابلس فرصة!

شكراً لكل من لبى هل دعوة، و الشكر الأكبر للأب الرئيس يلي سمحلنا نحتفل بطرابلس بقلب العاصمة بيروت بحرم الجامعة اليسوعية العريقة.

شكراً للجميع.